

U KORAK S VREMENOM

U subotu, 05. marta održan je mjesečni sastanak studenata stipendista u prostorijama Fondacije Hastor, a ovaj sastanak učinili su zanimljivim naši stipendisti Sanel Delić, Imrana Horozović i Lejla Džananović koji su za ovu priliku priredili prezentaciju na temu e-learning, te održali radionicu na kojoj su stipendisti imali priliku naučiti kako napraviti infografike i postere koji će im dobro doći u realizaciji volonterskih sastanaka.

Stipendisti Fondacije Hastor koji volontiraju na terenu trude se da svaki volonterski sastanak osmisle na drugačiji način kako bi svoje voloterske sate odradili kvalitetno, i istovremeno učinili zanimljivim našim mlađim stipendistima, a pritom ih naučili i nešto novo. Svjesni smo koliko brzo napreduje tehnologija i da živimo u dobu kada nam je potrebno znanje dostupno u svako doba, i uz malo truda, na internetu možemo pronaći sve sadržaje koji nas zanimaju i koji su nam potrebni. Stare metode zamijenjene su novima, primjenjuju se nove tehnike, i ukoliko želimo da budemo u koraku s vremenom, jednostavno moramo naučiti koristiti i primjenjivati ove tehnike i metode. Fondacija Hastor prati trendove, a u zadnje vrijeme prisutna je potreba da se savremenije metode rada prenesu i na naše stipendiste kako bismo im olakšali osmišljavanje i realizaciju njihovih volonterskih sastanaka. U tu svrhu, ovaj mjesečni sastanak iskoristili smo kako bismo upoznali naše studente sa najnovijim online mogućnostima, a stečeno znanje naši studenti primijenit će praktično i prenijeti na naše najmlađe stipendiste. Prezentaciju na temu e-learning održao je naš stipendista Sanel Delić koji je prisutnim studentima predstavio niz web stranica namijenjenih za učenje. Na ovim sajtovima mogu se naučiti korisne stvari iz različitih oblasti



kao što su: matematika, ekologija, hemija, ekonomija, programiranje, a tu su i programi koji mogu poslužiti kod pravljenja postera, sviranje nekog instrumenta ili crtanja. Neki od tih programa čak nude i certifikate. Neke od stranica koje mogu pružiti edukovanje iz željenih oblasti, a koje su predstavljene kroz prezentaciju su: Udemy, Codecademy, Udacity, Drawspace, Dave conservatorie, Canvas network, edX, Khan Academy, Stanford online, Canva, kao i Piktochart, program koji su stipendisti koristili tog dana kako bi napravili svoj poster.

U praktičnom dijelu ovog sastanka stipendisti su bili raspoređeni u grupe, a svaka grupa je imala po jedan laptop na kojem su trebali raditi kao tim i zajednički napraviti poster. Teme su bile različite za svaku grupu. Neke od tema su bile: Sedam svjetskih čuda, Rijeke u BiH, Planine u BiH, Najljepši dvorci na svijetu, 5 najmanjih država na svijetu itd. Na kraju ove interesantne radionice predstavnici grupa su predstavili svoje radove. Na ovom druženju, naši stipendisti su, osim što su naučili jako korisne stvari, imali priliku upoznati se međusobno kroz timski rad.

Sadžida Kosovac
Džulisa Otuzbir

NOVI PRIJATELJI FONDACIJE HASTOR

Izuzetno nam je drago što je potencijal Fondacije Hastor prepoznala i Sberbank BH d.d. Sarajevo i odlučila nam se pridružiti u osnaživanju mladih na njihovom putu ka uspjehu!



SBERBANK

AMILA MEKIĆ PRVAKINJA NA MEĐUNARODNOM KARATE TURNIRU

Početkom marta održan je 11. međunarodni karate-turnir "Ilidža open 2016." u organizaciji karate kluba Champion povodom dana općine Ilidža. Ovaj prestižni turnir okupio je ekipe iz devet zemalja regiona i svijeta, sa više od 1200 učesnika u kategoriji djece, kadeta, juniora i seniora. Učesce na ovom turniru zabilježila je i naša stipendistica Amila Mekić koja je osvojila prvo mjesto u kategoriji žena do 55 kg.

Amila je stipendistica Fondacije Hastor već 6 godina. Nakon završene srednje škole „Gimnazija Dobrinja“ školovanje nastavlja na Poljoprivredno-prehrambenom fakultetu u Sarajevu. Već 12 godina trenira u karate klubu „Champion“ i ostvaruje zapažene rezultate. Na proteklom Međunarodnom prvenstvu održanom u Sarajevu osvojila je prvo mjesto. Njeni najveći uspjesi do sada su 3. mjesto na Balkanskom prvenstvu u Makedoniji, 5. mjesto na Svjetskom kupu u Laškom u Sloveniji, te veliki broj medalja, naročito zlatnih, sa Međunarodnih prvenstava širom Evrope. No, dodaje da njeni ciljevi još uvijek nisu ostvareni, te da su dosadašnje medalje samo koraci koji vode ka ispunjenju njenih snova. Njen najveći san je da postane evropska i svjetska prvakinja i da nastupi na Olimpijadi 2020. godine.


„Ljubav prema karateu je neizmjerena, jer to je sport koji usmjerava sportistu/čovjeka ka pozitivnim ciljevima u životu. Karate osim što razvija samoodbrambene

vještine, on razvija izuzetne psihičke sposobnosti, karakteristike i navike poput samopouzdanja, pedantnosti, umjerenosti, racionalnosti, organiziranosti i samokontroli. Obzirom da karate razvija ovakve osobine kod mene, nije mi teško uskladiti obaveze vezane za fakultet i Fondaciju Hastor. Međutim, ponekad se desi da se neke obaveze poklope u istim trenucima pa se moram odlučiti za prioritete. Naravno, fakultet mi je najveći prioritet, zbog čega sam jako zahvalna trenerima, predsjedniku kluba, kao i Fondaciji Hastor na ukazanom povjerenju i razumijevanju.“



UPOZNAJMO NOVE STIPENDISTE FONDACIJE HASTOR!

Nastavljamo sa upoznavanjem naših novih stipendista koji su se porodici Fondacije Hastor pridružili u decembru 2015. godine. U prethodnom broju upoznali smo Jasminu, Sakiba, Mirzu, Anisu i Amilu, a sada ćemo vam predstaviti preostalih pet stipendista.



ADNAN IBRIĆ

(Prirodno-matematički fakultet, Tuzla)

„Mislim da jedan stipendista Fondacije Hastor mora biti vrijedan, ambiciozan i imati jasne ciljeve u životu. Fondacija mi pruža veliku podršku u mom daljem obrazovanju i od velikog je značaja što ne moram tražiti novac od roditelja da bih se školovao.“

Student je treće godine Prirodno-matematičkog fakulteta, Univerziteta u Tuzli, na Odsjeku za matematiku. Srednjoškolsko obrazovanje završio je u Gimnaziji Lukavac gdje bilježi brojne uspjehe na takmičenjima iz matematike, stoga Adnanov izbor fakulteta nije začuđujući. Na takmičenjima iz matematike bilježi impresivne rezultate: prvo mjesto na matematičkoj olimpijadi Bosne i Hercegovine, sreberena medalja na Balkanskoj matematičkoj olimpijadi 2013. i bronzana medalja na Međunarodnoj matematičkoj olimpijadi 2013. godine. Povremeno drži instrukcije iz matematike za studente i učenike srednjih škola i priprema učenike srednjih škola za takmičenja. Učestvovao je u radu komisija na kantonalnim i federalnim takmičenjima.



NEJRA ŠUBARA

(Fakultet humanističkih nauka, Mostar)

„Smatram da stipendista Fondacije Hastor treba prije svega da bude ambiciozan, odgovoran u svakom pogledu, otvoren za saradnju i za pomoć drugima, treba da bude osoba koja je spremna uložiti veliki trud da bi napravila promjene prije svega u svom životu, a onda i u društvu. Čast mi je što je baš meni pružena prilika da budem dio ove velike porodice. Kao i svakom studentu, podrška Fondacije Hastor mi mnogo znači, olakšava moje školovanje i moj put ka ostvarenju ciljeva. Drago mi je imati nekoga ko se brine za mene, moj uspjeh, ko ulaže u moje školovanje a ja se nadam da ću to na najbolji mogući način uzvratiti Fondaciji.“

Nejra je studentica druge godine Fakulteta humanističkih nauka na Odsjeku za turski jezik i književnost. Zanimljivo je da inače nije ljubitelj jezika i da više voli prirodne nauke, no otkriva kako je od djetinjstva željela biti nastavnik ili profesor, odnosno neko ko će prenositi znanje drugima.

„Nisam se mogla zamisliti u nekoj drugoj struci pa sam izabrala da izučavam turski jezik. Još jedan razlog jeste to što imam namjeru prevoditi knjige ili bar učestvovati jednim dijelom u prevodenju knjiga sa turskog na bosanski jezik. Oduvijek mi je želja bila da i nakon moje smrti iza mene ostane nešto što će koristiti ljudima, pa sam se odlučila za knjigu kao za nešto čija vrijednost nikada ne prolazi.“ Kao učenica Nejra je postizala brojne uspjehe i tokom osnovnog i srednjoškolskog obrazovanja bilježi odličan uspjeh.

Izdvaja prvo mjesto na takmičenju iz vjeronauke u četvrtom razredu gimnazije gdje je kao nagradu osvojila putovanje u Tursku. Slobodno vrijeme koristi da nauči nešto novo ili da pročita neku knjigu. Zaključuje da na putu ka uspjehu moramo prije svega imati jasan cilj i znati tačno šta želimo, a zatim da bismo ostvarili zacrtani cilj potrebno je mnogo žrtve, odricanja i upornosti.

MARIJA PIŠKOVIĆ

(Muzička akademija, Sarajevo)

„Svaki put nakon izlaska iz ureda Fondacije postanem veselija i iznova dobivam motivaciju za daljnji rad. Fondacija Hastor također omogućava upoznavanje i druženje s ljudima koje vjerovatno drugačije ne bih upoznala, te također pruža edukacijski program. Kako bi netko postao stipendist Fondacije Hastor, potrebno je da je taj netko prije svega susretljiva osoba, odgovorna, ažurna, uči druge i uči od drugih, gradi ono što je dobro, a mijenja ono manje dobro i veoma važno da je savjesna osoba. Ponosna sam što sam dio jedne takve organizacije kao što je Fondacija Hastor.“

Marija je studentica druge godine Muzičke akademije Univerziteta u Sarajevu, Opću gimnaziju završila je u Posušju, a uporedo sa gimnazijom završila je i Srednju glazbenu školu, smjer flauta, te Pripremnu školu za solo pjevanje u Imotskom.

„Cijeli svoj život sam okružena muzikom. Još kao mala, dok nisam bila ni dovoljno odrasla za dječiji zbor, imala sam tako jaku želju da sudjelujem u jednom od njih. Moje starije sestre su pohađale muzičku školu i pjevale u zborovima. Nakon nekoliko godina došlo je i moje vrijeme. Roditelji su me upisali u dječiji zbor, potom u Osnovnu muzičku školu, opredijelili za smjer flautu, iako ni oni sami ne znaju zašto. U početku muzičkog školovanja nisam imala simpatije konkretno prema nekom određenom instrumentu, ali s godinama se uistinu rodila ljubav prema flauti.“

Tokom školovanja bilježi uspjehe u muzičkim i literarnim takmičenjima, uz to bila je i članica Udruge mladih „Dnevni boravak“ i član organizacije „Frama“ s kojima je učestvovala u raznim projektima, radionicama, humanitarnim akcijama i akcijama čišćenja okoliša. Sudjelovala je na raznim festivalima i koncertima, i bila član ili voditelj pojedinih vokalno-instrumentalnih sastava. Slobodno vrijeme posvećuje pjevanju, sviranju i čitanju knjiga.





LEJLA RAMIĆ

(Pravni fakultet, Sarajevo)

„Ulaganjem u kvalitetne pojedince Fondacija doprinosi ličnom razvoju samog pojedinca kao i društva. Podrška Fondacije Hastor mi je od izuzetnog značaja. Velika je čast biti prepoznat kao pojedinac, za kojeg se vjeruje, da može dati doprinos u pravcu vizije i misije koje gaji Fondacija Hastor. Zadovoljstvo mi je da sam dio porodice Fondacije koja gaji vrijednosti koje su i moje lične. Moje zadovoljstvo biva još izražajnije znajući da na mom akademskom putu, putu ka obrazovanju i doprinosu mom društvu imam podršku Fondacije, podršku bez koje bi sve izgledalo teže. Hvala Fondaciji!”

Lejla je studentica treće godine Pravnog fakulteta Univerziteta u Sarajevu. Otkriva da ju je zanimanje pravnika oduvijek privlačilo. Tokom školovanja, uspjehe bilježi kao učesnik niza takmičenja kako u srednjoj školi poput prve pomoći, matematike i fizike, tako i tokom fakultetskog obrazovanja gdje je bila demonstrator na ekonomsko-pravnoj katedri te trenutno obnaša funkciju potpredsjednice sektora za seminare i konferencije u Evropskom udruženju studenata prava (ELSA) Sarajevo. Uz navedenu funkciju odabrana je i za direktoricu za zabavni program u okviru velikog regionalnog projekta mladih pravika pod nazivom VII EX-YU konferencija. Također, uspjeh je ostvarila kao saradnik na projektu Druge ljetne pravne škole koju organizuju studenti za studente te uspješno privela kraju dopunske kurseve iz oblasti međunarodnog i evropskog prava, ljudskih prava i medijskog prava. Volontirala je u SOS dječijem selu, gdje je predavala matematiku, i u Crvenom križu Centar. Trenutno je član studentske humanitarne organizacije „Ruku na srce” u okviru koje redovno učestvuje u velikoj novogodišnjoj akciji „Nijedno dijete bez paketića”. Također, trudi se da odvoji vrijeme za sport i rekreaciju.

„Moj recept za uspjeh je izreka irskog dramatičara i romanopisca Samuela Becketa. Njegova izreka glasi: „Jesi li ikada pokušao? Nisi uspio? Nije važno! Pokušaj ponovo! Doživi opet neuspjeh. Ovaj puta bolji neuspjeh!” Uspješne krasi vjera u sebe i snaga da iz svake prilike i neprilike nauče nove stvari i ojačaju. Smatram da uspjesi ne smiju biti sami sebi cilj, oni u konačnici trebaju dovesti do individue čije ljudske vrijednosti krasi plemenitost, filantropija i humanost.”

ALMIN IBRELJIĆ

(Tehnološki fakultet, Tuzla)

„Stipendista Fondacije Hastor mora biti uspješna i ambiciozna osoba, za koju izraz „ne mogu” ne postoji. Osoba koja se trudi i uspješno izvršava sve svoje obaveze i ciljeve bez obzira na prepreke i poteškoće koje ga sputavaju na putu do uspjeha. Mislim da je Fondacija u meni prepoznala baš tu energiju i želju za uspjehom, te sam baš zbog toga izabran u top 15 među više od 200 kandidata na konkursu. Pored materijalne podrške koja je naravno veoma bitna, stipendija Fondacije Hastor u meni budi nadu da u našoj državi još uvijek ima ljudi koji cijene rad i poštovanje, te da život u našoj domovini ipak ima budućnost uz ovakve ljude. Smatram da ću kroz svoj volonterski rad i mjesečne sastanke dodatno poboljšati svoje moralne vrijednosti, te da ću po završetku studija i prestanku stipendiranja postati bolji čovjek nego što sam bio prije nego sam postao stipendista Fondacije Hastor.”

Almin je student druge godine Tehnološkog fakulteta Univerziteta u Tuzli na Odsjeku za prehrambenu tehnologiju. Gimnaziju „Mustafa Novalić” završio je u Gradačcu.

„Pošto sam od svoje osnovne škole zavolio hemiju i ostale prirodne znanosti i zbog toga što živim u Posavini gdje se zahvaljujući povoljnim reljefnim uslovima razvila poljoprivreda, a samim tim i prehrambena industrija, odlučio sam se za Prehrambenu tehnologiju jer smatram da se u tom sektoru mogu zaposliti. Pored toga namjeravam završiti magisterij nutricionizma i otvoriti savjetodavni ured za ishranu jer gojaznost je sve veći problem modernog društva, pa smatram da ovo zanimanje ima dobru perspektivu.”

Tokom srednjoškolskog obrazovanja bilježi odličan uspjeh kroz sve četiri godine školovanja, dok je na fakultetu među najboljim studentima na svom smjeru. U srednjoj školi bio je predsjednik Vijeća učenika, pa se tako povezao i sa drugim nevladinim organizacijama poput ASU-BiH i KULT, te se kroz te organizacije bavio volontiranjem, najviše na poboljšanju prava učenika. Trenutni hobiji su mu nogomet i gledanje filmova. Alminov recept za uspjeh je prvenstveno želja za uspjehom i dobro isplanirano vrijeme. Smatra da uspješan čovjek mora imati tačno isplaniran svaki dan kako bi mogao ostvariti svoje ciljeve i postići ono što je naumio. Pored toga, treba biti vrijedan i marljiv, te neprekidno raditi na poboljšanju svojih sposobnosti i znanja.



REDAKCIJA FONDACIJE HASTOR U OPARI

Članice naše Redakcije Hanka Mujkić i Džulisa Otuzbir su u subotu, 19. marta, posjetile studente koji volontiraju sa učenicima osnovnih škola u prostorijama Osnovne škole „Edhem Mulabdić“ u Opari (Novi Travnik), te provele par sati u druženju sa našim stipendistima. U nastavku donosimo izvještaj sa ovog druženja.

Tog sunčanog jutra, u nešto ranijim satima, krenule smo u terensku posjetu Osnovnoj školi „Edhem Mulabdić“ u Opari gdje su nas volonteri Muharem Karać i Muamer Duratbegović zajedno sa djecom čekali u punom sastavu. Zatekli smo ih kako sa velikom zainteresovanošću diskutuju o temama Kako unaprijediti Bosnu i Hercegovinu, te Pronalaženje problema u lokalnoj zajednici i pokušaj njihovog rješavanja. Sastanku su prisustvovala ukupno dvadeset dva učenika osnovnih škola. Nakon što smo se predstavile i objasnile im svrhu našeg dolaska, učenici su, sa još većom motivacijom nastavili sa započetim poslom. Bilo je zanimljivo čuti mišljenja i stavove naših osnovaca o tome kako bi i na koji način doprinijeli i unaprijedili naše društvo i zajednicu. Ovom prilikom povezali smo se i sa temom Moje zanimanje sutra koju su naši volonteri sa učenicima obrađivali na nekom od

prethodnih sastanaka i zaključili da je odabir našeg budućeg zanimanja bitan za unapređenje zajednice i društva. Naši stipendisti podijelili su sa nama svoje snove o budućnosti. Neki od njih žele postati doktori, učitelji ili policajci, te na taj način, obavljajući posao koji vole, učestvovat će u izgradnji jedne bolje i svjetlije budućnosti za sve nas. Zaključili smo da na putu ka ostvarenju ovih ciljeva nužno je obrazovanje jer je znanje uistinu najmoćnije oružje koje može donijeti promjene. Izuzetno nam je drago što su naši osnovci prepoznali misiju i viziju Fondacije Hastor o kojima im svakoga sastanka govore i njihovi mentori Muharem i Muamer. Fondacija Hastor svojim djelovanjem itekako unapređuje cjelokupnu zajednicu, a našim stipendistima usaduje osjećaj empatije i društvene odgovornosti - bio je zaključak ove diskusije. Posvjedočile smo jednom zaista zreloom i obećavajućem razmišljanju te

osjetismo nadu da će naše nadolazeće generacije napraviti pozitivne promjene u društvu i na tren nas preplavi doza ponosa. Nakon diskusije svi zajedno smo pogledali kratku prezentaciju i film o životu i prilikama u Bosni i Hercegovini koji su pripremili marljivi volonteri. Uz obećanje da ćemo obavezno u narednim mjesecima ponovo doći u posjetu, napustile smo učionicu i učenike ostavile u ugodnoj atmosferi. Nakon iscrpljujućih predavanja i nekoliko mjeseci provedenih u Sarajevu, terenska posjeta ovim volonterima bila je dodatni vid odmora i opuštajućeg druženja.

Hanka Mujkić
Džulisa Otuzbir



FEBRUAR 2016.

U Konjicu, Hebibović Jasmina sa 8 učenika zakazala druženje u svojoj kući u Ovčarima 6.2.2016. godine od 10 sati. Na stolu sokovi i grickalice. Prepoznajem učenike iz različitih mjesta oko Konjica. Hakalović Arnela - Donje Višnjovice, Jablič Zuhra - Gabelovina. Ova su mjesta udaljena od Ovčara oko 40 kilometara. Jedno sa juga, a drugo sa sjevera. Zamolih Jasminu da se uvijek dobro pripremi za ova druženja kako bi učenici imali što više koristi kad već prevaljuju ovoliki put. Učenici mi se pohvališe da su im ova druženja dobro došla jer u selima iz kojih dolaze nemaju vršnjaka. Porazgovarismo o učenju i o tome šta bi ko volio postati i zašto pa se uputih dalje.

Ključ od zgrade Osnovne škole u Olovu dobila Kulo Emra od direktora pa se i nedjeljom može družiti sa učenicima stipendistima Fondacije Hastor. Tačno u 10 sati, 7.2.2016., stižem pred školu, a Emra me vidjela kroz prozor pa otvorila vrata škole i čeka. Kaže nije zadovoljna sa današnjim odzivom djece jer su neka prehladna, neka gripozna, a ima i onih koji nisu mogli doći jer nedjeljom ne voze đački autobusi. U učionici osmero djece već rade zadatke koje im je Emra zadala. Jedan učenik vrti kovertu u ruci. Pitam ga šta je to? „Ma, sad mi Emra donijela pismo. Ja sam pisao Administraciji Fondacije Hastor pa mi oni odgovorili. Baš sam se obradovao, a i majka će se radovati jer je pismo pisano olovkom, a rukopis je jako lijep“. Pitam Emru šta je pripremila za danas. Iz njenog izlaganja vidim da se vrlo marljivo i odgovorno pripremila, pa poslije kraćeg razgovora sa učenicima o učenju i dolasku na ova druženja uputih se dalje.

Najavljena volontiranja za 14. februar 2016. godine u Kotorskom, a na tom pravcu i u Novom Šeheru i u Kaknju. Odlučih se da u 9 sati budem u Novom Šeheru gdje je u zgradi Osnovne škole zakazao druženje Pepelar Bakir. Prozivam Bakira u 9 sati a on reče da je kod kuće i da će stići za par minuta. Ubrzo stiže vidno uzbuđen. Pokušava da mi objasni da je pomjerio vrijeme početka za 10 sati i da mu je i žao i krivo što me nije na vrijeme izvijestio. U 10 sati stiže 13 učenika osnovne škole, dva učenika javili da su bolesni. Razgovaram sa prisutnima i saznajem da su većina postali stipendisti samo zato što su iz Maglaja, grada koji je pretrpio velike štete od poplava 2014. godine. Uputih Bakiru kritiku što me nije izvijestio o pomjeranju vremena volontiranja, a on obeća da se ovako nešto više neće ponoviti. Pozdravih se i uputih za Kotorsko. U Kotorskom, Memić Zada zakazala sa pet učenika volontiranje u zgradi Vatrogasnog

doma. Stigoh kratko poslije 12 sati, oni se uveliko zaposlili. Neki crtaju, neki pišu, a neki čitaju. Baš prava radna atmosfera. Saznadoh da su sve vrijedni učenici, uglavnom odlični i vrlodobri. Jedna učenica se našali: „Mi smo se zavadili sa ocjenama manjim od četiri, ne damo im da se sa nama druže.“ I Zada mi reče da je vrlo zadovoljna sa ovom grupom. „Vrlo su odgovorni i tačni, a i predsjednik Vatrogasnog društva nam je dao ovaj prostor da u zimskom periodu možemo koristiti.“ Pozdravih se pa krenuh za Vogošću.

Direktor Osnovne škole u Kladnju odobrio Halilagić Hasanu da može koristiti prostor u školi za druženje sa stipendistima Fondacije Hastor. Ulazim u učionicu 20.2.2016. godine u 9 sati, a tamo već stigli učenici iz Stupara, iz Tuholja, mjesta udaljenih preko 20 kilometra, kao i oni iz Kladnja i bliže okoline. Hasan me upozna da je za danas pripremio obaveznu temu „Stari zanati“ ali su ga neki učenici zamolili da im pomogne da savladaju neke lekcije iz matematike i engleskog jezika pa je i to uplanirao u program za danas. Porazgovarah sa učenicima o dolasku na ove sastanke, o uspjehu na polugodištu, dadoh par uputa pa se uputih za Kalesiju.

U Osnovnoj školi u Kalesiji 20.2. sretah se sa direktorom Hamzić Fahrudinom koji mi objasni da je na molbu Imamović Nermine i Bečić Samre odobrio učenicima stipendistima Fondacije Hastor da mogu koristiti jednu učionicu, da ne traže druge prostore, jer je saznao da su se za prostor snalazili po tržnim centrima, po kafićima, po picerijama... „Ovak, učionice su za učenje.“ Veoma zadovoljan ulazim u učionicu, a tamo dvadeset devet učenika i organizator ovog skupa Imamović Nermine organizovali debatu na temu: „Zanati nekad i sad“. Prateći ovu debatu i razgovarajući sa učenicima koji su došli iz Memića, Snagova i drugih mjesta oko Kalesije, udaljenih desetina kilometara, zadržah se puno duže nego što sam planirao. Pozdravih se pa krenuh dalje.


Od 9:30 sati u Tržnom centru Bingo u Goraždu zakazali volontiranje studenti Spahović Dževad i Dardagan Elma sa osam učenika osnovnih škola. Od 10 sati Zajković Amra i Kudin Ilvana sa 13 učenika srednjih škola, Karkelj Elvin i Neziri Elvira sa 14 učenika srednjih škola, te Kadrić Emina i Bašić Nejra od 11 sati sa 8 učenika srednjih škola. Studenata 8, osnovaca 8 i 35 srednjoškolaca druže se u Tržnom centru Bingo u Goraždu. Kad ovo vidjeh sjetih se jučerašnje posjete u Kalesiji gdje direktor škole Hamzić



Fahrudin kaže: „Dao sam im prostor u školi da se ne snalaze po tržnim centrima, po kafićima.“ Zamolih studente da ubuduće pokušaju ove sastanke organizovati na boljim mjestima. Porazgovarah i sa učenicima, pozdravih se i krenuh dalje.

Za zadnji vikend u februaru 2016. godine jako velika brojnost studenata stipendista Fondacije Hastor najavili volontiranje. 157 studenata je najavilo volontiranje samo za subotu 27. i nedjelju 28. februara 2016 godine. Odlučih se da posjetim u subotu četiri studenta, jednog u Jajcu, dva u Ključu i jednog u Prijedoru, koji će se družiti sa 17 osnovaca i 7 srednjoškolaca. To je put od 520 kilometara. U 10 sati u Jajcu Keljalić Nejra okupila 8 učenika da obrade obaveznu temu, da im pomogne u savladavanju nastavnog gradiva iz pojedinih predmeta, a i da se malo poigraju. Učenici stigli iz udaljenih mjesta kao što je Kruščića i druga sela oko Jajca. Kažu da im ovo druženje baš dobro dođe jer se sa Nejrom lijepo slažu. Obećao mi da će i dalje marljivo učiti kako bi opravdali povjerenje roditelja, a i Fondacije Hastor. Pozdravih se pa krenuh za Ključ. Stigoh u Ključ u hotel „Lane“ u 12 sati, a za jednim stolom sjede studenti Delalović Amela i Huskić Denis sa učenicom Zvirkić Nerminom. Pridruživ im se. Denis mi pokazuje na laptopu pisanu pripremu za danas. Svidje mi se kako je to pripremio pa ga pohvalih, ali im i prigovorih da pokušaju naći neko drugo mjesto kad se drugi put htjednu družiti. Pozdravih se i krenuh za Prijedor, tačnije Oštru Luku u selo Ališiće. U 13 sati stigoh u Ališiće u kuću Medine Ališić koja ima grupu od 15 učenika. Kad uđoh u prostoriju pogled mi privukoše knjige po stolu ispred učenika. Medina mi objasni da je za danas pored ostalog pripremila i razgovor o pročitanim knjigama. Vidim „Robinson Kruso“, „Pinokio“ kao i druge knjige. Pridruživ im se pa kao nekad održah čas lektire. Zaključih da su im ova druženja draga jer ima učenika koji dolaze iz udaljenosti veće od 20 kilometara. Pohvalih ovo druženje i ovaj rad pa se uputih za Vogošću.

Ramo Hastor



Vedad Huseinbašić – Bihać



MIRZA MURGA

Zbog svog višegodišnjeg rada, odgovornosti i ulaganja vremena u Fondaciju Hastor, Mirza Murga, student pete godine Stomatološkog fakulteta u Sarajevu, okitio se titulom Stipendista mjeseca za mjesec mart.

Mirza je rođen 12. juna 1992. godine u Livnu gdje je završio Osnovnu školu Fra Lovro Karaula, a nakon toga i Opću gimnaziju. Koliko je tada bio uspješan pokazuje to što je bio učenik generacije i u osnovnoj i u srednjoj školi. Po završetku srednje škole, upisuje Stomatološki fakultet Univerziteta u Sarajevu.

Prostorije Fondacije Hastor krasi nekoliko njegovih likovnih radova, što je dokaz njegovog

talenta, kreativnosti i maštovitosti u likovnom izražavanju. Pored toga što u svoje slobodno vrijeme crta, pravi stripove i slično, voli i da čita. Također kako bi stekao što više prakse i usavršio se, popravljajući zube i vrši druge stomatološke usluge, jer voli raditi sa pacijentima i u budućnosti bi želio nastaviti da radi to što voli i steći iskustva kako u BiH tako i u inostranstvu. Mirza pored maternjeg jezika govori njemački i engleski jezik. Svoje kvalitete je pokazao radeći administrativne poslove u Fondaciji Hastor dvije godine, a sada volontira na terenu sa stipendistima Osnovne škole Srednje. Učestvovao je u raznim projektima Fondacije Hastor, pored toga je na otvaranju Vijećnice na njemačkom jeziku pozdravio sve prisutne osobe, te volontirao na Diplomatskom zimskom bazaru. Također je vodio i nekoliko sastanaka stipendista na kojima je govorio o stomatologiji, bontonu i drugim temama.

„Stipendista Fondacije Hastor sam već osam godina, odnosno od drugog razreda srednje škole. U Fondaciji Hastor sam kroz zajednički



rad upoznao dosta ljudi s kojima sam izgradio velika prijateljstva, zatim naučio dosta stvari i često se iznenadim mogućnostima koje pruža Fondacija Hastor. Fondacija je neko na koga se mogu osloniti, neko ko cijeni moj trud i rad, neko ko je prepoznao moj osjećaj za stvaranje kistom, koji nastojim prenijeti na precizan rad na pacijentima.“

Sadžida Kosovac

RAD MJESECA

FONDACIJA HASTOR

Figuru i oblik nažalost nema,
One oko sebe na dobar put sprema.
Ne razdvaja ljude, na velike i male,
Daje punom rukom i vrijedna je hvale.
Asrce joj veliko koliko tvoja želja,
Crnim tužnom životu, donosi veselja.
Izvodi na pravi put, učenike, đake,
Jednako ih pretvara u borbene junake.
Ai one male ljude, koje život gazi,

Hvaljena "junakinja" k'o najrođenijeg pazi.
Ali i ova "junakinja" svog junaka ima,
Slavni dobri Ramo, sve na mjesto štima.
To je naš učitelj, humanost mu jača strana,
On je vodič ka znanju, osoba bez mana.
Redom amo čitajte, u tekstu prva slova,
i znat ćete junakinju iz naslova.

Rašida Brkić – Malkoč
Bivša stipendistica Fondacije Hastor

IMPRESUM

FONDACIJA HASTOR

REDAKCIJA